



14963/24

**Comhad Idirinstitiúideach:
2022/0410(NLE)**

**FISC 208
ECOFIN 1203**

NÓTA

ó:	Ardrúnaíocht na Comhairle
chuig:	An Chomhairle
Ábhar:	Dréacht-Rialachán Cur Chun Feidhme ón gComhairle lena leasaítear Rialachán Cur Chun Feidhme (AE) Uimh. 282/2011 a mhéid a bhaineann le ceanglais faisnéise le haghaidh scéimeanna áirithe CBL – Comhaontú polaitiúil

Gheobhaidh na toscaireachtaí i gceangal leis seo an téacs an dréacht-Rialacháin Cur Chun Feidhme thuasluaite ón gComhairle d'fhonn teacht ar chomhaontú polaitiúil ag cruinniú den Chomhairle (Gnóthaí Eacnamaíocha agus Airgeadais) an 5 Samhain 2024.

2022/0410 (NLE)

Dréacht

RIALACHÁN CUR CHUN FEIDHME ÓN gCOMHAIRLE

lena leasaítear Rialachán Cur Chun Feidhme (AE) Uimh. 282/2011 a mhéid a bhaineann le ceanglais faisnéise le haghaidh scéimeanna áirithe CBL

TÁ COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh,

Ag féachaint do Threoir 2006/112/CE ón gComhairle an 28 Samhain 2006 maidir leis an gcóras comhchoiteann cánach breislúacha¹, agus go háirithe Airteagal 397 di,

Ag féachaint don togra ón gCoimisiún Eorpach,

De bharr an mhéid seo a leanas:

- (1) Ar mhaithe le feidhmiú ceart mhúnla an tsoláthróra mheasta, le haghaidh ardáin, tairseacha, nó bealaí eile lena n-éascaítear soláthar seirbhísí cóiríochta gearrthearmaí ar cíos nó seirbhísí iompartha paisinéirí de bhóthar, dá dtagraítear in Airteagal 28a de Threoir 2006/112/CE, is gá gnéithe áirithe den bheart a shonrú.

¹ IO L 347, 11.12.2006, lch. 1.

- (2) Daoine inchánacha a éascaíonn, trí chomhéadan leictreonach, mar shampla ardán, margadh, tairseach nó bealach comhchosúil eile a úsáid, soláthar seirbhísí cóiríochta gearrthearmaí ar cíós, nó seirbhísí iompartha paisinéirí de bhóthar, is gá deimhneacht dhlíthiúil a sholáthar dóibh maidir le cé acu atá nó nach bhfuil feidhm ag an mbeart soláthróra mheasta maidir leo, agus sin a dhéanamh tríd an téarma ‘éascaíonn’ a shainmhíniú. Ba cheart soláthróirí áirithe, ar a n-áirítear iad siúd a sholáthraíonn liostálacha, a eisiamh go sainráite ón mbeart toisc nach dtéann siad in iomaíocht dhíreach leis na hearnálacha traidisiúnta, neamhdhigiteacha.
- (3) [scriosta]
- (4) [scriosta]
- (5) Maidir le daoine inchánacha a éascaíonn, trí chomhéadan leictreonach a úsáid, mar shampla margadh, ardán, tairseach nó bealach comhchosúil eile, soláthar seirbhísí cóiríochta gearrthearmaí ar cíós, nó seirbhísí iompartha paisinéirí de bhóthar, níor cheart dliteanas a chur orthu as aon CBL atá dlite a íoc nuair a ghníomhaíonn siad de bhun faisnéis a sholáthraíonn an soláthróir foluiteach, más rud é gur féidir leis na daoine inchánacha sin a thaispeáint nárbh fhéidir leo ar bhonn réasúnta a bheith ar an eolas go raibh an fhaisnéis sin mícheart.
- (6) Maidir le daoine inchánacha a éascaíonn, trí chomhéadan leictreonach a úsáid, mar shampla margadh, ardán, tairseach nó bealach comhchosúil eile, soláthar seirbhísí cóiríochta gearrthearmaí ar cíós, nó seirbhísí iompartha paisinéirí de bhóthar, agus arb iad na soláthróirí measta, ba cheart dóibh a bheith in ann stádas an chustaiméara, is é sin le rá faighteoir na seirbhísí foluiteacha, a shainnithint go héasca. Le gurbh fhusa an tsainnithint sin a dhéanamh agus chun an t-ualach riaracháin atá ar na daoine inchánacha sin a laghdú, ba cheart do na daoine inchánacha sin glacadh leis gur duine inchánach é an custaiméir i gcás ina soláthraítear uimhir aitheantais chun críocha CBL, agus gur duine neamh-inchánach é i gcás nach soláthraítear an uimhir sin.

- (6a) Ba cheart a shoiléiriú, maidir le seirbhísí cóiríochta gearrthearmaí ar cíós agus seirbhísí iompartha paisinéirí de bhóthar, nach féidir feidhm a bheith ag an scéim speisialta d'fhiontair bheaga dá bhforáiltear i dThreoir 2006/112/CE ach amháin maidir leis an duine inchánach a mheastar ina leith gur sholáthair sé na seirbhísí sin.
- (7) Tá scéim simpliúcháin nua Ionad Ilfhreastail (OSS) le haghaidh daoine inchánacha a aistríonn earraí dílse áirithe trasteorann le tabhairt isteach faoi Threoir 2006/112/CE. Chun an scéim shonrach sin a chur chun feidhme i gcreat foriomlán na scéimeanna speisialta CBL dá bhforáiltear i dTeideal XII, Caibidil 6 de Threoir 2006/112/CE, ba cheart foráil a dhéanamh i Rialachán Cur Chun Feidhme (AE) Uimh. 282/2011 ón gComhairle² do rialacha sonracha a bhaineann le sainaitheint CBL, do choinníollacha le haghaidh eisiamh ón scéim, agus d'oibleagáidí i leith thuairisceáin CBL agus i leith coimeád taifead.
- (8) Toisc go mbeidh an scéim simpliúcháin nua OSS cuimsitheach agus go gcuimsítear inti gluaiseachtaí trasteorann earraí a chumhdaítear faoi láthair le socruithe stoic ar glao, tá na socruithe sin le baint amach as Treoir 2006/112/CE. Níl gá leis na forálacha cur chun feidhme a bhaineann leis na socruithe sonracha sin a thuilleadh agus dá bhrí sin ba cheart iad a scriosadh ó Rialachán Cur Chun Feidhme (AE) Uimh. 282/2011.
- (9) [scriosta]

² Rialachán Cur Chun Feidhme (AE) Uimh. 282/2011 ón gComhairle an 15 Márta 2011 lena leagtar síos bearta cur chun feidhme do Threoir 2006/112/CE maidir leis an gcóras comhchoiteann cánach breisluacha (IO L 77, 23.3.2011, lch. 1).

- (10) Faoi Airteagal 242a de Threoir 2006/112/CE, tá oibleagáid ar dhaoine inchánacha a éascaíonn, trí chomhéadan leictreonach, mar shampla margadh, ardán, tairseach nó modh comhchosúil eile a úsáid, soláthar earraí nó seirbhísí do dhuine neamh-inchánach laistigh den Chomhphobal i gcomhréir le forálacha Theideal V den Treoir sin taifid a choimeád ar na soláthairtí sin. Is i leith soláthairtí d'earraí nó de sheirbhísí a éascaítear tríd an gcomhéadan leictreonach áfach, agus i leith iad siúd amháin a theastaíonn faisnéis agus ní theastaíonn í i gcásanna ina mbíonn feidhm ag an riail maidir le soláthróir measta. Chun tacaíocht a thabhairt do chomhrac na calaoise CBL, ba cheart faisnéis mar sin a bhaineann le soláthróirí foluiteacha a áireamh freisin sa tacar faisnéise éigeantaí atá le coimeád ag soláthróirí measta atá cláraithe chun na scéimeanna speisialta simpliúcháin Ionad Ilfhreastail a úsáid. Mar gheall ar na sonraí breise sin, ba cheart go mbeifí in ann comparáid a dhéanamh idir faisnéis arna tuairisciú ag na hardáin agus sonraí íocaíochta maidir le hidirbhearta trasteorann atá ar fáil sa chóras leictreonach lárnach um fhaisnéis faoi íocaíochtaí arna bhunú le Caibidil V, Roinn 2, de Rialachán (AE) Uimh. 904/2010 ón gComhairle³ agus a tháinig i bhfeidhm an 1 Eanáir 2024.
- (10a) Tar éis oibleagáid nua a chur isteach do dhaoine inchánacha a aistríonn earraí de chuid duine inchánach eile, ba cheart a shonrú cad iad na sonraí sonracha atá le cur in iúl d'úinéir na n-earraí.
- (11) Na gnéithe de Threoir 2006/112/CE dá dteastaíonn leasuithe ar Rialachán Cur Chun Feidhme (AE) Uimh. 282/2011 dá mbarr, tá siad le trasú sa reachtaíocht náisiúnta ag na Ballstáit faoin 30 Meitheamh 2028. Dá bhrí sin is gá na leasuithe ar an Rialachán sin a bheith infheidhme ón 1 Iúil 2028.

³ Rialachán (AE) Uimh. 904/2010 ón gComhairle an 7 Deireadh Fómhair 2010 maidir le comhar riaracháin agus calaois a chomhrac i réimse na cánach breisluacha (IO L 268, 12.10.2010, lch. 1).

(12) Ba cheart, dá bhrí sin, Rialachán Cur Chun Feidhme (AE) Uimh. 282/2011 a leasú dá réir,

TAR ÉIS AN RIALACHÁN SEO A GHLACADH:

Airteagal 1

Leasaítear Rialachán Cur Chun Feidhme (AE) Uimh. 282/2011 mar a leanas:

(1) cuirtear na hairteagail seo a leanas isteach:

'Airteagal 9b

1. Chun críoch Airteagal 28a de Threoir 2006/112/CE a chur i bhfeidhm, ciallaíonn an téarma 'éascaíonn' comhéadan leictreonach a bheith á úsáid ag duine inchánach chun é a chur ar a gcumas do chustaiméir agus soláthróir a thairgeann, laistigh den Aontas, soláthairtí cóiríochta gearrthearmaí ar cíos nó seirbhísí iompartha paisinéirí de bhóthar tríd an gcomhéadan leictreonach dul i dteagmháil le chéile, rud a mbíonn soláthar na seirbhísí sin tríd an gcomhéadan sin mar thoradh air.

I gcás, áfach, nach gcomhlíontar na coinníollacha seo a leanas uile ní mheasfar go bhfuil soláthar cóiríochta gearrthearmaí ar cíos nó seirbhísí iompartha paisinéirí de bhóthar á éascú ag duine inchánach:

- (a) ní hé an duine inchánach sin a shocraíonn, go díreach nó go hindíreach, ceann ar bith de na téarmaí agus na coinníollacha a ndéantar an soláthar fúthu;
- (b) níl baint ag an duine inchánach sin, go díreach nó go hindíreach, le húdarú an mhuirir a ghearrtar ar an gcustaiméir i leith na n-íocaíochtaí a dhéantar;
- (c) níl baint ag an duine inchánach sin, go díreach nó go hindíreach, le soláthar na seirbhísí sin.

2. Ní bheidh feidhm ag Airteagal 28a de Threoir 2006/112/CE maidir le duine inchánach nach ndéanann ach ceann ar bith díobh seo a leanas:

- (a) próiseáil íocaíochtaí i ndáil le soláthar cóiríochta gearrthearmaí ar cíos nó seirbhísí iompartha paisinéirí de bhóthar;
- (b) liostú nó fógraíocht i ndáil le seirbhísí cóiríochta ghearrthearmaí ar cíos nó seirbhísí iompartha paisinéirí de bhóthar;
- (c) atreorú nó aistriú custaiméirí go dtí comhéadain leictreonacha eile ar a bhfuil cóiríocht ghearrthearmach nó seirbhísí iompartha paisinéirí de bhóthar á ndíol, gan aon pháirt eile a imirt sa soláthar.

3. D’ainneoin mhír 1, ní bheidh feidhm ag Airteagal 28a de Threoir 2006/112/CE maidir le duine inchánach a sholáthraíonn na modhanna trínar féidir costais seirbhísí iompartha paisinéirí de bhóthar a chomhroinnt idir an t-úsáideoir agus an duine a sholáthraíonn an t-iompar.

Airteagal 9c

Chun pointí (a) agus (b) de mhír 1 d’Airteagal 28a de Threoir 2006/112/CE a chur i bhfeidhm, ní chuirfidh an duine inchánach a sholáthraíonn an tseirbhís an uimhir aitheantais chun críocha CBL ar fáil nó an uimhir a leithdháiltear i gcomhréir le hAirteagail 362 nó 369d dá dtagraítear i bpointe (a) agus an dearbhú dá dtagraítear i bpointe (b) don duine a éascaíonn an soláthar ach aon uair amháin, seachas má thagann athrú ar a ghníomhaíocht mar dhuine inchánach.

Chun pointe (a) de mhír 5 d'Airteagal 28a de Threoir 2006/112/CE a chur i bhfeidhm, ní chuirfidh an duine inchánach a sholáthraíonn an tseirbhís an fhaisnéis dá dtagraítear i bpointe (a) den mhír sin ar fáil don duine inchánach a éascaíonn an soláthar ach aon uair amháin, seachas má thagann athrú ar a ghníomhaíocht mar dhuine inchánach.

I gcás ina dtarlaíonn seirbhís iompartha paisinéirí de bhóthar i níos mó ná Ballstát amháin, soláthróidh an duine inchánach a thairgeann an tseirbhís don duine inchánach a éascaíonn an soláthar an uimhir aitheantais chun críocha CBL a leithdháil gach Ballstát ina ndéantar an t-iompar air, nó an uimhir a leithdháileadh air i gcomhréir le hAirteagail 362 nó 369d de Threoir 2006/112/CE.

Airteagal 9d

I gcás, ar bhonn faisnéis arna soláthar ag an duine a sholáthraíonn an tseirbhís fholuiteach, nach ngníomhaíonn an duine inchánach mar an soláthróir measta, ní bheidh an duine inchánach sin faoi dhliteanas i leith an CBL atá dlite a íoc, agus Airteagal 28a de Threoir 2006/112/CE á chur i bhfeidhm, i gcás ina dtugtar faoi deara ina dhiaidh sin go mba cheart an duine inchánach sin a bheith measta mar sholáthróir, i gcás ina gcomhlíontar na coinníollacha seo a leanas uile:

- (a) braitheann an duine inchánach ar an bhfaisnéis a sholáthraíonn soláthróir na seirbhísí;
- (b) tá an fhaisnéis a sholáthair soláthróir na seirbhísí earráideach;
- (c) is féidir leis an duine inchánach a chruthú nárbh fhéidir leis nó léi a bheith ar an eolas, ar bhonn réasúnta, go raibh an fhaisnéis sin earráideach.

Airteagal 9e

Chun áit soláthair na seirbhíse éascaíochta dá dtagraítear in Airteagal 46a a chinneadh, measfaidh an duine inchánach gur duine neamh-inchánach é an duine dár soláthraíodh na seirbhísí sin i gcás nach gcuireann an duine sin dár soláthraíodh na seirbhísí sin uimhir aitheantais CBL ar fáil, ach amháin má tá faisnéis dá mhalairt ag an duine inchánach sin.

Airteagal 9f

Beidh feidhm fós ag na díolúintí a leagtar síos in Airteagal 98(2), agus in Airteagail 371, 378, 379 go 386 agus 388 go 390c de Threoir 2006/112/CE i gcás ina meastar go bhfuair agus gur sholáthair an duine inchánach a éascaíonn an soláthar seirbhísí na seirbhísí sin iad féin faoi Airteagal 28a den Treoir sin.

Airteagal 9g

I gcás ina meastar go bhfuair agus gur sholáthair duine inchánach é féin na seirbhísí dá dtagraítear in Airteagal 28a de Threoir 2006/112/CE, is féidir soláthar na seirbhísí sin a bheith faoi réir na scéime speisialta dá bhforáiltear i dTeideal XII, Caibidil 1 den Treoir sin má chomhlíonann an duine inchánach sin na coinníollacha don scéim speisialta sin.

Soláthar na seirbhísí dá dtagraítear in Airteagal 28a de Threoir 2006/112/CE do dhuine inchánach a mheastar gurb é féin a fuair nó a sholáthair na seirbhísí sin, ní féidir soláthar na seirbhísí sin a bheith faoi réir na scéime speisialta dá bhforáiltear i gCaibidil 1 de Theideal XII den Treoir sin.;"

(1a) Cuirtear an méid seo a leanas in ionad Airteagal 13a:

‘Airteagal 13a

Is é a bheidh san áit a bhfuil duine dlítheanach neamh-inchánach bunaithe, dá dtagraítear sa dara fómhír d’Airteagal 54(1), sa chéad fhomhír d’Airteagal 56(2) agus in Airteagail 58 agus 59 de Threoir 2006/112/CE:

(a) an áit a dtugtar faoi fheidhmeanna a riaracháin lárnaigh; nó

(b) áit aon bhunaíochta eile arb é is saintréith di buaine leordhóthanach agus struchtúr oiriúnach i dtéarmaí acmhainní daonna agus acmhainní teicniúla chun cur ar a cumas na seirbhísí a sholáthraítear di dá riachtanais féin a fháil agus a úsáid.’;

(1b) in Airteagal 18(2), cuirtear an méid seo a leanas in ionad an dara fómhír:

‘Ach d’ainneoin faisnéise dá mhalairt, féadfaidh soláthróir seirbhísí teileachumarsáide, craolacháin nó seirbhísí a sholáthraítear go leictreonach, nó seirbhísí faoin dara fómhír d’Airteagal 54(1) de Threoir 2006/112/CE, féachaint ar chustaiméir atá bunaithe laistigh den Chomhphobal mar dhuine neamh-inchánach chomh fada agus nár chuir an custaiméir sin a uimhir aitheantais CBL aonair in iúl dó.’;

(1c) in Airteagal 23, cuirtear an méid seo a leanas in ionad mhír 2:

2. I gcás, i gcomhréir leis an dara fomhír d’Airteagal 54(1), agus Airteagail 58 agus 59 de Threoir 2006/112/CE, gurb inchánach soláthar seirbhísí ag an áit a bhfuil an custaiméir bunaithe, nó, in éagmais bunaíochta, an áit a bhfuil a sheoladh buan aige nó an áit a bhfuil gnáthchónaí air, bunóidh an soláthróir an áit sin ar bhonn faisnéise fíorasáí arna cur ar fáil ag an gcustaiméir, agus fíoróidh sé an fhaisnéis sin trí ghnáthbhearta slándála tráchtála ar nós iad siúd a bhaineann le seiceálacha aitheantais nó íocaíochta.’;

(1d) in Airteagal 24b, an chéad fhomhír, cuirtear an méid seo a leanas in ionad na foclaíochta tosaigh:

‘Chun an dara fomhír d’Airteagal 54(1) nó Airteagal 58 de Threoir 2006/112/CE a chur i bhfeidhm, i gcás ina ndéantar ócáid a shruthú nó a chur ar fáil go fíorúil ar bhealach eile, nó i gcás ina soláthraítear seirbhísí teileachumarsáide, craoltóireachta nó seirbhísí a sholáthraítear go leictreonach do dhuine neamh-inchánach.’;

(1e) in Airteagal 24d, cuirtear an méid seo a leanas in ionad mhír 1:

1. I gcás ina soláthraíonn soláthróir seirbhís faoin dara fomhír d’Airteagal 54(1) de Threoir 2006/112/CE, nó seirbhís a liostaítear in Airteagal 58(1) den Treoir sin, féadfaidh sé toimhde dá dtagraítear in Airteagal 24a nó i bpointe (a), (b) nó (c) d’Airteagal 24b den Rialachán seo a fhrisnéis ar bhonn trí mhír d’fhianaise neamh-fhrithráiteach lena dtugtar le fios go bhfuil an custaiméir bunaithe, go bhfuil a sheoladh buan nó go bhfuil gnáthchónaí air in áit eile.’;

(1f) In Airteagal 24f, cuirtear an méid seo a leanas in ionad na foclaíochta tosaigh:

‘Chun na rialacha sa dara fomhír d’Airteagal 54(1) nó Airteagal 58 de Threoir 2006/112/CE a chur i bhfeidhm agus ceanglais phointe (d) d’Airteagal 24b nó Airteagal 24d(1) den Rialachán seo a chomhlíonadh, beidh an méid seo a leanas, go háirithe, ina fhianaise:’;

(1g) Cuirtear an méid seo a leanas in ionad Airteagal 30:

Airteagal 30

1. Leis an soláthar seirbhísí arna dhéanamh ag idirghabhálaithe dá dtagraítear in Airteagal 46 de Threoir 2006/112/CE, cumhdófar seirbhísí de chuid idirghabhálaithe a fheidhmíonn in ainm agus thar ceann fhaighteoir na seirbhíse a fhaightear agus na seirbhísí a chuireann idirghabhálaithe i gcrích agus iad ag feidhmiú in ainm agus thar ceann sholáthraí na seirbhísí a fhaightear.

2. Chun críoch Airteagal 46a de Threoir 2006/112/CE, ciallaíonn an téarma ‘seirbhís éascaíochta’ an tseirbhís arna soláthar ag duine inchánach trí chomhéadan leictreonach a úsáid, mar shampla margadh, ardán, tairseach, nó modhanna comhchosúla, rud a ligeann do chustaiméir agus do sholáthróir dul i dteagmháil le chéile, a mbíonn soláthar na seirbhísí sin tríd an gcomhéadan sin mar thoradh air.

Is féidir an tseirbhís éascaíochta dá dtagraítear sa chéad fhomhír a sholáthar don chustaiméir, don soláthróir, nó don bheirt acu, agus measfar gur soláthar leithleach neamhspleách í ó na hearraí nó seirbhísí a mheastar atá á soláthar ag na daoine inchánacha sin.

Mar sin féin, ní mheasfar go bhfuil ‘seirbhís éascaíochta’ á soláthar ag duine inchánach i gcás, nach gcomhlíontar na coinníollacha seo uile a leanas:

(a) ní hé an duine inchánach sin a shocraíonn, go díreach nó go hindíreach, ceann ar bith de na téarmaí agus na coinníollacha a ndéantar an soláthar fúthu;

(b) níl baint ag an duine inchánach sin, go díreach nó go hindíreach, le húdarú muirir a ghearrtar ar an gcustaiméir i leith na híocaíochta a dhéantar;

(c) níl baint ag an duine inchánach sin, go díreach nó go hindíreach, le soláthar na soláthairtí sin.

Ní bheidh feidhm ag Airteagal 46a de Threoir 2006/112/CE maidir le duine inchánach nach ndéanann ach ceann ar bith díobh seo a leanas:

(a) próiseáil íocaíochtaí i ndáil leis an soláthar;

(b) liostáil nó fógraíocht i ndáil le hearraí nó seirbhísí;

(c) atreorú nó aistriú custaiméirí go dtí comhéadain leictreonacha eile ar a bhfuil earraí nó seirbhísí á ndíol, gan aon pháirt eile a imirt sa soláthar.’;

(2) in Airteagal 54a, cuirtear an mhír seo a leanas isteach:

3. Scoirfidh Caibidil X, Roinn 1A, d’fheidhm a bheith aici an 30 Meitheamh 2029.’;

(2a) in Airteagal 54c(2), cuirtear an méid seo a leanas in ionad pointe (b):

‘(b) tuairisc ar na hearraí, a luach, an áit a dtosaíonn agus a gcríochnaíonn seoladh nó iompar na n-earraí, mar aon le tráth an tsoláthair agus, má tá sí ar fáil, an uimhir ordaithe nó an uimhir idirbhirt uathúil’;

(2b) cuirtear an tAirteagal 54d seo a leanas isteach:

‘Airteagal 54d

Beidh an méid seo a leanas san fhaisnéis atá le soláthar i gcomhréir le hAirteagal 242b de Threoir 2006/112/CE:

- (a) an Ballstát óna seoltar nó óna n-iompraítear na hearraí;
 - (b) an Ballstát a seoltar nó a iompraítear na hearraí chuige;
 - (c) tuairisc ar na hearraí a aistrítear agus cainníocht na n-earraí sin;
 - (d) dáta an tseolta nó an iompartha.’;
- (3) i gCaibidil XI, cuirtear an méid seo a leanas isteach in ionad cheannteideal Roinn 2:

‘ROINN 2

Scéimeanna speisialta le haghaidh daoine inchánacha a sholáthraíonn seirbhísí do dhaoine neamh-inchánacha nó a dhéanann earraí, soláthairtí intíre áirithe earraí nó aistriú áirithe earraí dílse a chiandíol

(Airteagail 358 go 369xk de Threoir 2006/112/CE)’;

- (4) Leasaítear Airteagal 57a mar a leanas:

- (a) cuirtear isteach an pointe seo a leanas:

‘(3a) ‘ciallaíonn scéim aistrithe earraí dílse’ an scéim speisialta le haghaidh aistriú earraí dílse mar a leagtar amach i dTeideal XII, Caibidil 6, Roinn 5 de Threoir 2006/112/CE;’;

(b) cuirtear an méid seo a leanas in ionad phointí (4) agus (5):

‘(4) ciallaíonn ‘scéim speisialta’ an ‘scéim nach scéim de chuid an Aontais í’, ‘scéim an Aontais’, an ‘scéim allmhairiúcháin’, nó an ‘scéim aistrithe earraí dílse’ de réir mar a theastaíonn de réir an chomhthéacs;’;

(5) ciallaíonn ‘duine inchánach’ aon cheann díobh seo a leanas:

(i) duine inchánach dá dtagraítear in Airteagal 359 de Threoir 2006/112/CE atá ceadaithe chun an scéim nach scéim de chuid an Aontais í a úsáid;

(ii) duine inchánach dá dtagraítear in Airteagal 369b de Threoir 2006/112/CE atá ceadaithe chun scéim an Aontais a úsáid;

(iii) duine inchánach dá dtagraítear in Airteagal 369m de Threoir 2006/112/CE atá ceadaithe chun an scéim allmhairiúcháin a úsáid;

(iv) duine inchánach dá dtagraítear in Airteagal 369xb de Threoir 2006/112/CE atá ceadaithe chun an scéim aistrithe earraí dílse a úsáid;

(5) in Airteagal 57d, cuirtear mír 3 seo a leanas isteach:

3. I gcás ina gcuireann duine inchánach an Ballstát aitheantais ar an eolas go bhfuil sé ar intinn aige úsáid a bhaint as an scéim aistrithe earraí dílse, beidh feidhm ag an scéim speisialta sin ón gcéad lá den mhí féilire dár gcionn.

I gcás ina dtarlaíonn an chéad aistriú d’earraí atá le cumhdach ag an scéim aistrithe earraí dílse roimh an dáta sin, áfach, beidh feidhm ag an scéim speisialta ó dháta an aistrithe sin, ar choinníoll go gcuireann an duine inchánach an Ballstát aitheantais ar an eolas faoi thús a bheith á chur lena chuid gníomhaíochtaí atá le cumhdach faoin scéim speisialta, tráth nach déanaí ná an deichiú lá den mhí tar éis an chéad aistrithe sin.’;

(6) in Airteagal 57e, cuirtear an mhír seo a leanas isteach:

‘Sainaitheoidh an Ballstát aitheantais an duine inchánach a úsáideann an scéim aistrithe earraí dílse trí bhíthin a uimhir nó a huimhir aitheantais CBL dá dtagraítear in Airteagail 214 agus 215 de Threoir 2006/112/CE.’;

(7) Leasaítear Airteagal 57f mar a leanas:

(a) i mír 1, cuirtear an fhomhír seo a leanas isteach:

‘I gcás ina n-athraítear an Ballstát aitheantais i gcomhréir leis an dara fomhír den mhír seo, beidh feidhm ag an athrú sin freisin, más infheidhme, maidir leis an gclárú don scéim speisialta a leagtar síos i dTeideal XII, Caibidil 6, Roinn 5 de Threoir 2006/112/CE ón gComhairle.’;

(b) cuirtear an mhír seo a leanas isteach:

3. I gcás ina scoireann duine inchánach a úsáideann an scéim aistrithe earraí dílse de choinníollacha an tsainmhíneithe a leagtar síos in Airteagal 369xa, pointe (2) de Threoir 2006/112/CE a chomhlíonadh, scoirfidh an Ballstát inar sainaitníodh an duine inchánach sin de bheith ina Bhallstát aitheantais.

I gcás, áfach, ina gcomhlíonann an duine inchánach sin fós na coinníollacha chun an scéim speisialta sin a úsáid, chun leanúint den scéim speisialta sin a úsáid, cuirfidh an duine inchánach sin an Ballstát nua aitheantais in iúl mar an Ballstát ina bhfuil a ghnó bunaithe ag an duine inchánach sin nó, mura bhfuil a ghnó bunaithe sa Chomhphobal ag an duine inchánach sin, Ballstát ina bhfuil buanbhunaíocht ag an duine inchánach sin. I gcás nach bhfuil an duine inchánach a úsáideann an scéim aistrithe earraí dílse bunaithe sa Chomhphobal, cuirfidh an duine inchánach sin an Ballstát aitheantais nua in iúl mar Bhallstát óna seolann nó óna n-iompraíonn sé nó sí earraí.

I gcás ina n-athraítear an Ballstát aitheantais i gcomhréir leis an dara fomhír, beidh feidhm ag an athrú sin ón dáta a scoireann an duine inchánach d'áit ghnó nó buanbhunaíocht a bheith aige sa Bhallstát a cuireadh in iúl roimhe mar an Ballstát aitheantais nó ón dáta a scoireann an duine inchánach sin d'earraí a sheoladh nó a iompar ón mBallstát sin.

I gcás ina n-athraítear an Ballstát aitheantais i gcomhréir leis an dara fomhír den mhír seo, beidh feidhm ag an athrú sin freisin, más infheidhme, maidir leis an gclárú don scéim speisialta, mar a leagtar síos i dTeideal XII, Caibidil 6, Roinn 3 de Threoir 2006/112/CE ón gComhairle.';

(8) in Airteagal 57g, cuirtear an mhír seo a leanas isteach:

4. Duine inchánach a úsáideann an scéim aistrithe earraí dílse, féadfaidh sé scor den scéim speisialta sin a úsáid gan beann ar an duine inchánach sin fós a bheith nó gan a bheith ag aistriú earraí a d'fhéadfadh a bheith incháilithe don scéim speisialta sin. Cuirfidh an duine inchánach an Ballstát aitheantais ar an eolas 15 lá ar a laghad roimh dheireadh na míosa féilire roimh an mhí ina mbeartaíonn an duine inchánach sin scor den scéim a úsáid. Beidh éifeacht leis an scor ón gcéad lá den mhí féilire dár gcionn. Oibleagáidí CBL a bhaineann le hearraí dílse a aistriú a eascraíonn i ndiaidh an dáta a tháinig éifeacht leis an scor, déanfar iad a urscaoileadh go díreach le húdaráis na mBallstát ar seoladh nó ar iompraíodh earraí chucu agus astu.’;

(9) Leasaítear Airteagal 58 mar a leanas:

(a) cuirtear an méid seo a leanas in ionad mhír 1:

1. I gcás ina gcomhlíonann duine inchánach a úsáideann ceann de na scéimeanna speisialta ceann amháin nó níos mó de na critéir le haghaidh eisiamh a leagtar síos in Airteagail 369e nó 369xe de Threoir 2006/112/CE, nó maidir le scriosadh ón gclár aitheantais a leagtar síos in Airteagal 363 nó in Airteagal 369r(1) agus (3) den Treoir sin, eisíofaídh an Ballstát aitheantais an duine inchánach ón scéim sin.

An Ballstát aitheantais amháin a fhéadfaidh duine inchánach a eisiamh ó cheann de na scéimeanna speisialta.

Bunóidh an Ballstát aitheantais a chinneadh maidir le heisiamh nó scriosadh ar aon fhaisnéis is infhaighte, lena n-áirítear faisnéis a sholáthraíonn aon Bhallstát eile.’;

(b) cuirtear an mhír seo a leanas isteach:

‘2a. Beidh éifeacht le heisiamh duine inchánach ó scéim aistriithe earraí dílse ón gcéad lá den mhí féilire tar éis an lae a sheoltar an cinneadh maidir le heisiamh trí bhealach leictreonach chuig an duine inchánach. I gcás ina ndéantar an t-eisiamh mar gheall ar áit an ghnó nó na buanbhunaíochta a bheith athraithe, áfach, nó mar gheall ar an áit ina chuirtear tús le seoladh agus iompar earraí a bheith athraithe, beidh feidhm ag an eisiamh ó dháta an athraithe sin.’;

(10) Cuirtear an méid seo a leanas in ionad Airteagal 58a:

‘Airteagal 58a

Duine inchánach a úsáideann scéim speisialta ach nach ndearna, le linn tréimhse dhá bhliain, aon soláthairtí d'earraí nó de sheirbhísí ná aon aistriú d'earraí dílse a chumhdaítear leis an scéim speisialta sin, glacfar leis gur scoir sé dá chuid gníomhaíochtaí inchánach de réir bhrí Airteagal 363, pointe (b), Airteagal 369e, pointe (b), Airteagal 369r(1) pointe (b), Airteagal 369r(3), pointe (b), nó Airteagal 369xe, pointe (b) de Threoir 2006/112/CE. Ní bheidh an scor sin ina bhac ar scéim speisialta a úsáid má atosáíonn an duine inchánach sin na gníomhaíochtaí dá chuid ná dá cuid a chumhdaítear le haon scéim speisialta dá bhforáiltear i dTeideal XII, Caibidil 6 den Treoir sin.’;

(11) [scriosta]

(12) in Airteagal 58b, cuirtear an méid seo a leanas in ionad mhír 2:

2. Measfar gur theip ar dhuine inchánach nó idirghabhálaí go seasmhach na rialacha a bhaineann le ceann de na scéimeanna speisialta a chomhlíonadh, de réir bhrí Airteagal 363, pointe (d), Airteagal 369e, pointe (d), Airteagal 369r(1), pointe (d), Airteagal 369r(2), pointe (c), Airteagal 369r(3), pointe (d), nó Airteagal 369xe, pointe (d) de Threoir 2006/112/CE, sna cásanna seo a leanas:

- (a) i gcás inar eisigh an Ballstát aitheantais meabhrúcháin i ndáil le trí thréimhse tuairisceáin roimhe sin don duine inchánach de bhun Airteagal 60a den Rialachán seo, nó don idirghabhálaí a ghníomhaíonn ar a shon, agus nár cuireadh isteach an tuairisceán CBL le haghaidh gach aon cheann de na tréimhsí tuairisceáin sin laistigh de 10 lá ó seoladh an meabhrúcháin;
- (b) i gcás inar eisigh an Ballstát aitheantais meabhrúcháin i ndáil le trí thréimhse tuairisceáin díreach roimhe sin don duine inchánach de bhun Airteagal 63a den Rialachán seo nó don idirghabhálaí a ghníomhaíonn ar a shon agus nár íoc an duine inchánach sin, nó an t-idirghabhálaí a ghníomhaíonn ar a shon an CBL a dearbhaíodh le haghaidh gach aon cheann de na tréimhsí tuairisceáin sin laistigh de 10 lá ó seoladh an meabhrúcháin, ach amháin i gcás inar lú ná EUR 100 an méid neamhíoctha atá fágtha do gach tréimhse tuairisceáin;

- (c) i gcás inar theip ar an duine inchánach na taifid dá dtagraítear in Airteagail 369, 369k, 369x agus 369xk de Threoir 2006/112/CE a chur ar fáil go leictreonach tar éis iarraidh a fháil ón mBallstát aitheantais agus aon mhí amháin tar éis meabhrán a fháil ina dhiaidh sin ón mBallstát aitheantais, nó i gcás inar theip ar an idirghabhálaí a ghníomhaíonn ar a shon é sin a dhéanamh.’;

- (13) Cuirtear an méid seo a leanas in ionad Airteagal 58c:

‘Airteagal 58c

Duine inchánach a eisiadh ó scéim nach scéim de chuid an Aontais í, ó scéim an Aontais nó ó scéim aistrithe earraí dílse, déanfaidh sé na hoibleagáidí uile CBL a bhaineann le soláthairtí d'earraí nó de sheirbhísí, nó le haistriú earraí dílse, a eascraíonn tar éis an dáta a tháinig éifeacht leis an eisiadh a urscaoileadh go díreach le húdaráis chánach Bhallstát an tomhaltais lena mbaineann nó leis na Ballstáit ar seoladh nó ar iompraíodh na hearraí uathu nó chucu.’;

- (14) Leasaítear Airteagal 59 mar a leanas:

- (a) cuirtear an méid seo a leanas in ionad mhír 1:

1. Maidir le haon tréimhse thuairisceáin de réir bhrí Airteagail 364, 369f, 369s nó 369xf de Threoir 2006/112/CE, tréimhse thuairisceáin ar leith a bheidh inti.’;

- (b) cuirtear an mhír seo a leanas isteach:

‘2a. I gcás ina mbíonn feidhm ag an scéim aistrithe earraí ó dháta an chéad aistrithe, i gcomhréir le hAirteagal 57d(3), an dara fomhír, cuirfidh an duine inchánach tuairisceán CBL ar leith isteach le haghaidh na míosa féilire ar tharla an chéad aistriú lena linn.’;

(ba) cuirtear an méid seo a leanas in ionad mhír 3:

3. I gcás ina bhfuil duine inchánach cláraithe faoin scéim nach scéim de chuid an Aontais í agus faoi scéim an Aontais i rith tréimhse tuairisceáin, cuirfidh sé tuairisceáin CBL isteach agus, i gcás inarb infheidhme, déanfaidh sé na híocaíochtaí comhfhreagracha leis an mBallstát aitheantais i dtaca le gach scéim maidir leis na soláthairtí a rinneadh agus na tréimhsí arna gcumhdach ag an scéim sin.

(c) cuirtear an mhír 3a seo a leanas isteach:

‘3a. I gcás inar cláraíodh duine inchánach faoin scéim aistrithe earraí dílse le linn tréimhse tuairisceáin, cuirfidh an duine inchánach tuairisceáin CBL faoi bhráid an Bhallstáit aitheantais i leith aon aistriú a rinneadh agus na dtréimhsí arna gcumhdach ag an scéim speisialta sin.’,

(d) cuirtear an méid seo a leanas in ionad mhír 4:

4. I gcás ina n-athraítear an Ballstát aitheantais i gcomhréir le hAirteagal 57f tar éis chéad lá na tréimhse tuairisceáin atá i gceist, cuirfidh an duine inchánach nó an t-idirghabhálaí a ghníomhaíonn ar a shon tuairisceáin CBL isteach agus, i gcás inarb infheidhme, cuirfidh an duine sin íocaíochtaí comhfhreagracha chuig an mBallstát a bhí ina Bhallstát aitheantais roimhe sin agus chuig an mBallstát aitheantais nua lena gcumhdaítear na soláthairtí a rinneadh le linn na dtréimhsí faoi seach a raibh na Ballstáit sin ina mBallstáit aitheantais lena linn’;

(15) Cuirtear an méid seo a leanas in ionad Airteagal 59a:

‘Airteagal 59a

I gcás nár sholáthair duine inchánach a úsáideann scéim speisialta aon earraí nó aon seirbhísí in aon Bhallstát tomhaltais nó nach ndearna sé aon aistriú d’earraí dílse faoin scéim aistrithe dílse le linn tréimhse thuairisceáin agus nach bhfuil aon cheartúcháin le déanamh aige i leith tuairisceáin CBL a rinneadh roimhe sin, cuirfidh an duine inchánach, nó an t-idirghabhálaí a ghníomhaíonn ar a shon tuairisceán CBL isteach ag cur in iúl nach ndearnadh aon soláthairtí agus nach ndearnadh aon aistriú le linn na tréimhse sin (tuairisceán CBL nialais).’;

(16) Cuirtear an méid seo a leanas in ionad Airteagal 60a:

‘Airteagal 60a

Meabhróidh an Ballstát aitheantais, trí mheán leictreonach, do dhaoine inchánacha, nó d’idirghabhálaithe a ghníomhaíonn ar a son, ar theip orthu tuairisceán CBL a chur isteach faoi Airteagail 364, 369f, 369s nó 369x de Threoir 2006/112/CE, an oibleagáid atá orthu an tuairisceán CBL sin a chur isteach. Eiseoidh an Ballstát aitheantais an meabhrúchán ar an deichiú lá tar éis an dáta ar cheart an tuairisceán a chur isteach, agus cuirfidh sé in iúl do na Ballstáit eile trí mheán leictreonach gur eisíodh meabhrúchán.

Is é an Ballstát tomhaltais lena mbaineann nó na Ballstáit ar seoladh nó ar iompraíodh na hearraí uathu nó chucu a bheidh freagrach as aon mheabhrúchán agus as aon chéim a ghlacfar ina dhiaidh sin chun CBL a mheasúnú agus a bhailiú.

D’ainneoin aon mheabhrúchán arna eisiúint nó aon chéim arna tabhairt ag Ballstát tomhaltais nó aon Bhallstáit ar seoladh nó ar iompraíodh na hearraí uathu nó chucu, cuirfidh an duine inchánach nó an t-idirghabhálaí a ghníomhaíonn ar a shon an tuairisceán CBL faoi bhráid an Bhallstáit aitheantais.’;

(17) Cuirtear an méid seo a leanas in ionad Airteagal 61:

Airteagal 61

1. Na figiúirí atá i dtuairisceán CBL a bhaineann le tréimhsí suas go dtí an dara tréimhse thuairisceáin in 2021, an tréimhse sin san áireamh, ní dhéanfar aon athrú orthu tar éis don tuairisceán CBL sin a bheith curtha isteach ach amháin trí leasuithe ar an tuairisceán CBL sin, agus ní dhéanfar coigeartuithe ar thuairisceán CBL ina dhiaidh sin.

Na hathruithe ar na figiúirí atá i dtuairisceán CBL a bhaineann le tréimhsí ón tríú tréimhse thuairisceáin in 2021, áireofar iad sa tuairisceán CBL suas go dtí an dáta faoinar gá an tuairisceán CBL a chur isteach i gcomhréir le Treoir 2006/112/CE. Na figiúirí atá i dtuairisceán CBL a bhaineann le tréimhsí ón tríú tréimhse thuairisceáin in 2021, ní dhéanfar aon athrú orthu tar éis an dáta faoinar gá an tuairisceán CBL a bheith curtha isteach i gcomhréir le Treoir 2006/112/CE ach amháin trí choigeartuithe a dhéanamh orthu i dtuairisceán CBL arna ndéanamh ina dhiaidh sin.

2. Cuirfear na leasuithe dá dtagraítear i mír 1 faoi bhráid an Bhallstáit aitheantais go leictreonach laistigh de thrí bliana ón dáta faoinar gá an chéad tuairisceán a bheith curtha isteach.

Ní dhéanfar aon difear, áfach, do rialacha an Bhallstáit tomhaltais maidir le measúnuithe agus leasuithe ná do rialacha céanna na mBallstát ar seoladh nó ar iompraíodh na hearraí uathu nó chucu.’;

(18) Cuirtear an méid seo a leanas in ionad Airteagal 61a:

‘Airteagal 61a

1. Cuirfidh duine inchánach nó duine a ghníomhaíonn ar a shon an tuairisceán deiridh CBL agus aon tuairisceáin CBL a rinneadh roimhe sin atá á gcur isteach go déanach, agus na híocaíochtaí comhfhreagracha, i gcás inarb ábhartha, faoi bhráid an Bhallstáit a bhí ina Bhallstát aitheantais tráth an scoir, an eisiaimh nó an athraithe i gcás inar fíor an méid seo a leanas maidir leis an duine inchánach sin:

- (a) scoireann sé de cheann de na scéimeanna speisialta a úsáid;
- (b) eisiatar ó cheann de na scéimeanna speisialta é;
- (c) athraíonn sé an Ballstát aitheantais i gcomhréir le hAirteagal 57f.

Aon cheartúcháin ar an tuairisceán deiridh CBL agus ar thuairisceáin CBL a rinneadh roimhe sin a dhéantar tar éis don tuairisceán deiridh a bheith curtha isteach, déanfar iad a urscaoileadh go díreach le húdaráis chánach Bhallstát an tomhaltais lena mbaineann nó leis na Ballstáit ar seoladh nó ar iompraíodh na hearraí uathu nó chucu.

2. Maidir le gach duine inchánach a ngníomhaíonn idirghabhálaí ar a shon, cuirfidh an t-idirghabhálaí sin na tuairisceáin deiridh CBL agus aon tuairisceáin CBL a bhí ann roimhe sin atá á gcur isteach go déanach, agus na híocaíochtaí comhfhreagracha, i gcás inarb ábhartha, faoi bhráid an Bhallstáit a bhí ina Bhallstát aitheantais tráth an scriosta nó an athraithe i gcás inar fíor an méid seo a leanas maidir leis an idirghabhálaí sin:

- (a) scriosadh ón gclár sainaitheantais é;
- (b) d'athraigh sé an Ballstát aitheantais i gcomhréir le hAirteagal 57f(2).

Aon cheartúcháin ar an tuairisceán deiridh CBL agus ar thuairisceáin CBL a rinneadh roimhe sin a dhéantar tar éis don tuairisceán deiridh a bheith curtha isteach, déanfar iad a urscaoileadh go díreach le húdaráis chánach Bhallstát an tomhaltais lena mbaineann nó leis na Ballstáit ar seoladh nó ar iompraíodh na hearraí uathu nó chucu.’;

(19) Leasaítear Airteagal 63c mar a leanas:

(a) leasaítear mír 1 mar a leanas:

(i) cuirtear an méid seo a leanas in ionad phointe (b):

‘(b) cineál na seirbhísí nó tuairisc ar na hearraí a sholáthraítear agus cainníocht na n-earraí sin; lena léirítear, i gcás inarb infheidhme, an soláthar é i gcomhréir le hAirteagail 16, 18 nó 26 de Threoir 2006/112/CE tar éis aistriú a bheith déanta faoin scéim speisialta a leagtar amach i Roinn V de Chaibidil 6 de Theideal XII;’;

(ii) cuirtear isteach an pointe seo a leanas:

‘(ba) an fhaisnéis ábhartha a bhaineann le coigeartuithe i gcomhréir le Caibidil 5 de Theideal X de Threoir 2006/112/CE tar éis aistriú a bheith déanta faoin scéim speisialta a leagtar amach i Roinn V de Chaibidil 6 de Theideal XII;

(iii) cuirtear an méid seo a leanas in ionad phointe (f):

‘(f) an ráta CBL a cuireadh i bhfeidhm, i gcás inarb ábhartha;

(iv) cuirtear isteach an pointe seo a leanas:

‘(fa) i gcás díolúine lena ngabhann ceart asbhainte, tagairt don fhoráil is infheidhme de Threoir 2006/112/CE ón gComhairle, nó don fhoráil náisiúnta chomhfhreagrach;’;

(v) cuirtear an méid seo a leanas in ionad phointe (g):

(g) an méid CBL is iníoctha agus an t-airgeadra a úsáideadh, i gcas inarb ábhartha;’;

(vi) cuirtear an méid seo a leanas in ionad phointí (k) agus (l):

‘(k) i leith seirbhísí, an fhaisnéis a úsáideadh chun áit sholáthar na seirbhíse a chinneadh agus, i leith earraí, an fhaisnéis a úsáideadh chun an áit inar tosaíodh agus inar críochnaíodh seoladh nó iompar na n-earraí chuig an gcustaiméir a chinneadh;

(l) aon fhianaise faoi earraí a d’fhéadfadh a bheith curtha ar ais, lena n-áirítear an méid inchánach agus an ráta CBL a cuireadh i bhfeidhm, i gcas inarb infheidhme;’;

(vii) cuirtear an pointe seo a leanas isteach:

‘(m) i leith soláthairtí i gcás ina meastar go bhfuair agus gur soláthair an duine inchánach earraí i gcomhréir le hAirteagal 14a de Threoir 2006/112/CE, ainm, seoladh poist agus seoladh leictreonach nó suíomh gréasáin an tsoláthóra arb iad soláthairtí dá chuid atá á n-éascú trí úsáid an chomhéadain leictreonaigh, agus, más infhaighte iad:

(i) uimhir aitheantais CBL nó uimhir chánach náisiúnta an tsoláthóra;

(ii) uimhir chuntas bainc nó uimhir chuntas fíorúil an tsoláthóra.’;

(b) leasaítear mír 2 mar a leanas:

(i) cuirtear an méid seo a leanas in ionad phointe (f):

‘(f) an ráta CBL a cuireadh i bhfeidhm, i gcas inarb ábhartha;’;

(ii) cuirtear isteach an pointe seo a leanas:

‘(fa) i gcás díolúine lena ngabhann ceart asbhainte, tagairt don fhoráil is infheidhme de Threoir 2006/112/CE ón gComhairle, nó don fhoráil náisiúnta chomhfhreagrach;’;

(iii) cuirtear an pointe seo a leanas isteach:

‘(n) i leith soláthairtí i gcás ina meastar go bhfuair agus gur sholáthair an duine inchánach earraí i gcomhréir le hAirteagal 14a de Threoir 2006/112/CE, ainm, seoladh poist agus seoladh leictreonach nó suíomh gréasáin an tsoláthóra arb iad soláthairtí dá chuid atá á n-éascú trí úsáid an chomhéadain leictreonaigh, agus, más infhaighte iad:

- (i) uimhir aitheantais CBL nó uimhir chánach náisiúnta an tsoláthóra;
- (ii) uimhir chuntas bainc nó uimhir chuntas fíorúil an tsoláthóra.’;

(c) cuirtear an mhír seo a leanas isteach:

‘2a. Chun go measfar go bhfuil na taifid a choimeádann an duine inchánach mionsonraithe go leordhóthanach de réir bhrí Airteagal 369xk de Threoir 2006/112/CE, ní mór an fhaisnéis seo a leanas uile a bheith iontu:

(a) a mhéid a bhaineann leis an mBallstát ónar seoladh nó ónar n-íompraíodh na hearraí:

(i) uimhir aitheantais CBL an duine inchánaigh nó a uimhir aitheantais chánach sa Bhallstát sin, más ann di;

(ii) an seoladh ónar seoladh nó ónar n-íompraíodh na hearraí;

- (b) a mhéid a bhaineann leis an mBallstát ar seoladh nó ar iompraíodh na hearraí chuige:
- (i) uimhir aitheantais CBL an duine inchánaigh nó a uimhir aitheantais chánach sa Bhallstát sin, más ann dí;
 - (ii) an seoladh ar seoladh nó ar iompraíodh na hearraí chuige;
- (c) tuairisc ar na hearraí a seoladh nó a iompraíodh chuig Ballstát eile agus cainníocht na n-earraí sin, lena léirítear, i gcás inarb infheidhme, an earraí caipitiúla iad sin mar a shainmhíníonn an Ballstát ar seoladh nó ar iompraíodh na hearraí chuige;
- (d) dáta seolta nó iompartha na n-earraí dá dtagraítear i bpointe (c);
- (e) an méid inchánach agus an t-airgeadra a úsáideadh á chur in iúl;
- (f) aon mhéadú nó aon laghdú ina dhiaidh sin ar an méid inchánach;
- (g) i gcás ina ndéantar féinsonrascadh, an fhaisnéis a chuimsítear ar an sonrasc;';
- (d) cuirtear an méid seo a leanas in ionad mhír 3:

3. Déanfaidh an duine inchánach nó an t-idirghabhálaí a ghníomhaíonn ar a shon an fhaisnéis dá dtagraítear i míreanna 1, 2 agus 2a den Airteagal seo a thaifeadadh ar bhealach a fhágann gur féidir í a chur ar fáil trí mheán leictreonach gan mhoill agus i leith gach seirbhíse nó earra aonair a sholáthraítear, nó a aistrítear. I gcás inar iarradh ar an duine inchánach sin nó ar an idirghabhálaí a ghníomhaíonn ar a shon na taifid dá dtagraítear in Airteagail 369, 369k, 369x agus 369xk de Threoir 2006/112/CE a chur isteach trí mheán leictreonach agus gur theip air iad a chur isteach laistigh de 20 lá ó dháta an iarrata sin, meabhróidh an Ballstát aitheantais don duine inchánach nó don idirghabhálaí a ghníomhaíonn ar a shon na taifid sin a chur isteach. Cuirfidh an Ballstát aitheantais in iúl trí mheán leictreonach do na Ballstáit tomhaltais nó do na Ballstáit ar seoladh nó ar iompraíodh an meabhrán uathu agus chucu gur seoladh an meabhrúchán.’.

Airteagal 2

Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.

Beidh feidhm aige ón 1 Iúil 2028.

Beidh feidhm ag Airteagal 1, pointí (1a) go (1f), áfach, ó theacht i bhfeidhm an Rialacháin seo.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil,

Thar ceann na Comhairle

An tUachtarán